



PDKÎ hêvîxwaz e ku birîndar bi lez birînên wan qenc bin, herwisa piştevaniya xwe ji Hikûmeta Herêma Kurdistanê û hêza pêşmergeyên Kurdistanê bo parêzgarî ji Kurd û Kurdistanê radigehîne, û amadeyiya xwe bo her cure alîkariyekê li gorî şiyana xwe radigehîne.

R: 2

Bidestveanîna mafên netewî yê gelê kurd di çarçoveya Îraneke demokratîk û federal de

AGIRÎ

Xwazaya Kurdistanê ber bi jinavçûnê

...» 4

Bilavkirina parazîtê bo ser mahwareyan û bandorên wê

...» 9

Duheftînameyek Siyasî-Gîştî Ye, PDK Îranê diweşîne www.kurdistanmedia.com/kurdî www.agirimedia.org Hejmar (235) 06-08-2014 Buha (150) Tûmen

Rejîma Îranê sedema sereke ya terorê di Efxanistanê de ye



Birêz Çeko Rehîmî: "Rejîma Îranê ava rûbarên Kurdistanê bo herêmên din dibe"...

...» 5



Mela Aware stêrka geş di esmanê tevgera 46-47 (67-68'an a Zayînî)

...» 3

Jiyan û serpêhatiya Ayşe îsmailî (Hawrê) di hevpeyvîna di gel Agirî



...» 8

Kurdistanmedia: Berpirsyarên ewlehiya Efxanistanê bas ji rêjeya teror û kuştaran zincîreyî, û armancdarên bajarê Heratê dikin, û rejîma Îranê bi sebebkarê sereke yê van teror û kuştaran dizanin.

Nûçegihaniyên Efxanistanê ji zarê Semîullah Qetre fermandeyê Polîsê Heratê, bilav kirin ku komeke belgeyan di ber dest de hene, ku ew

belge nîşan didin ku rejîma Îranê dest di kuştaran zincîreyî û armancdarên wilayeta Herat de heye, û ji aliyê vê rejîmê ve rêxistin bo wan hatiye kirin.

Qetre ragehandiye: "Rejîma Îranê hejmareke çekdarên li dijî dewleta Efxanistanê perwerde kirine, da ku li dijî vê hikûmetê û gihîştina bi armancên xwe, wan bi kar bînin.

Li gorî gotina navbirî, rejîma Îranê di hemberî terora kesên deshildar de pere dide.

Li gorî serjimêriyan ji destpêka sala 1390'an (2011) şûnde, heya niha nêzîk bi 90 kes ji hêzên ewlekarîyê, berpirsyarên payebilindên dewletî, û kesên xwedînfûz ji aliyê çekdarên nenaskirî ve hatine terorkirin.

Sergotar

Kurdistan stargeha
penaberan

Şehab Xalidî

Rojek ji rojan Kurdistanê başûr bibû behsa gellek ji ragehandinên bi hêz ên cîhanê, jiber ku xelkê wê herêmê bi sedema êrîşên rejîma Sedam aware û derbider bibûn û rû li xaka Kurdistanê Îranê û Kurdistanê bakûr kiribûn. Di vê koçberiya bi milyonî de, çi bela nemabû ku nehatin serê wan, zarok li himbêza dayîkan de can didan, û kalemêr ji ber nesaxiyê dimirin, û bîrsîtiyê qedem ji wan dişkandin.

Lê îro her ew xak, ew nîştîman bûye stargehek ew qas êmin û tena, ku li asta tewahiya herêma Rojhilata Navîn de bê mînak e. Kurdên vê herêmê, niha deriyê mala xwe ya mezin, wate Kurdistanê bi rûyê ne tenê Kurdên penaber yên Bexda, Mûsil û Şengalê, belkû bi rûyê Ereban û Mesîhiyan de jî vekirine.

Lewra niha Kurdistanê Başûr, ne di warê penaberbûna xelkê xwe de, belkû berevajî di warê hesta wan ya mirovdostiyê de bûye behsa gellek ji ragehandinên cîhanê, û gellek hikûmetên cîhanê bi çavên rêz û hurmet ve li Kurdistanê Başûr, xelk û deshilata wir dinîhêrin erê dizanin ku Kurd hêjayî hebûna dewleteke serbixwe ne.

Kurdan di vê para Kurdistanê azadkirî de, selimandin ku ew tu carî êrîşkar û zalim nebûne, belkû berevajî ew hatine çewsandin û xaka wan hatiye parvekirin. Ew çawa ji nîştîmana xwe hez dikin, wisa jî, ji mirovahiyê û ji alîkarîkirina bi mirovan re hez dikin, û ew daxwazkarê cîhaneke azad, demokratîk, û aram in ku têde hemû mirovek bi bê cudahiya ol û neteweyî, pêkve bijî.

Herwisa ew helwesta Hikûmeta Herêma Kurdistanê Başûr, ji bo raya giştî ya cîhanê û ji bo dost û dijminên Kurd jî dersên pirr girîng têde hebûn, ku bê guman dibe her kurdekî wetaparêz şanaziyê bi wan helwestan ve bike. Bi hêviya vê ku ew herêm rojek serbixwe be, û hêviyên wan yên bi salan bibin rastî.

Daxûyaniya Deftera Siyasî ya PDKÎ derheq êrîşa DAÎŞ'ê bo
ser çend herêmên Kurdistanê

Mixabin eva çend rojek dibe, ku serbarê hewlên Hikûmeta Herêma Kurdistanê bona neketina di nav şerekî nexwastî û aloziyên van dawiyane ên Îraqê, serbarê hezkekirina Herêma Kurdistanê, lê ew şer û alozî di çend herêmên Kurdistanê de berbirûyê xelkê herêmên Celewla, Se'diye, û bi taybetî Şengal û Zommar û hêza pêşmerge di Kurdistanê Başûr de bûye.

Çekdarên DAÎŞ'ê li gorî bîrûbaweriyêke paşvemayî, û kiryarên tundrewane êrîşeke berfireh kirin ser van herêman û hejmareke zaf ji xelkê van herêman şehîd kirin, hejmareke berçav jî revandin û di encam de bi hezaran kesî ji mal û cihê jiyana xwe aware û koçber bûn. Çekdarên DAÎŞ'ê dest ji teqandin û jinavbirina cihên pîroz ên peyrewên ayîn û ayînzayên Îslamî jî neparastin, û bê hurmetiyê bi hemû van baweriyên dikin ku ji bo xelkê pîroz in.

Encama van êrîşên DAÎŞ'ê wisa nîşan dide ku karesateke mirovî ya jî vê qasê zêdetir jî, renga di herêmên Kurdekî de rû bide. Heçend berevanîkirina hêza pêşmerge û cangorîtiya hêza pêşmerge kariye

bandorê li ser sînoordarkirina van êrîşan danê, û heya hejmarek ji van can li ser destan, goriyê bergirî ji xaka Kurdistanê bike, lê bi vî halî jî metirsiya DAÎŞ'ê li ser can û malê xelkê van herêman her heye.

Ya balkêş ew e ku civaka navneteweyî, welatên xwedî nîfûz û rêkxirawa Neteweyên Yekbûyî, û...hwd derheq pêşgirtin ji vê karesata mirovî, Kurd û Herêma Kurdistanê bi tenê nehêlin, û alîkariya wan tenê di çarçoveya mehkûmkirin û nîgeraniyê de nemîne.

Jiber ku erka li ser milên hemû aliyekî ye ku di vê derheq de alîkar û xwedî helwest bin, çi di warê alîkariya di gel awareyan bi giştî û Êzidiyan bi taybetî, ku zexteke zêdetir li ser wan heye, çi jî bo bihêzkirina hêza pêşmerge.

Metirsiya êrîşa çekdarên DAÎŞ'ê her bi tenê di çarçoveya Kurdistanê Başûr de berteng nabe, û li Kurdistanê Rojava jî, bi Taybetî di Kobanê de, ew êrîş û tundrewî berdewam in ku zirareke berçav li pey xwe hebûye.

PDKÎ tevî rêzgirtina ji riha pak ya şehîdan û qurbanîyên vê karesatê,

PDKÎ hêvîxwaz e ku birîndar bi lez birînen van qenc bin, herwisa piştewaniya xwe ji Hikûmeta Herêma Kurdistanê û hêza pêşmergeyên Kurdistanê bo parêzgarî ji Kurd û Kurdistanê radigehîne, û amadeyiya xwe bo her cure alîkariyekî li gorî şiyana xwe radigehîne.

û rêzgirtina ji cangorîtiya hêza pêşmerge, sersaxiyê dibêje malbatên şehîdên van bûyeran, û hêvîxwaz e ku birîndar bi lez birînen van qenc bin, herwisa piştewaniya xwe ji Hikûmeta Herêma Kurdistanê û hêza pêşmergeyên Kurdistanê bo parêzgarî ji Kurd û Kurdistanê êşkere dike, û amadeyiya xwe bo her cure alîkariyekî li gorî şiyana xwe radigehîne.

Di hemem demê de daxwazê ji kom û komeleyên navneteweyî û hemû aliyekî dike ku di vê rewşa hestiyar de, xwedî helwesteke hejî û alîkarane ya bi kiryar bin. Ji vê yekê jî zêdetir erka hêzên siyasî û xortên neteweya Kurd e ku bi yekrêzî û yekdengî û hevhelwestiya xwe, parastina xak û xelkê Kurdistanê wke erka sereke ya li ser milên xwe bizanin, û di vê derheqê de, li gorî bername û pilaneke baş û binecî, li dijî her êrîşekê bo ser xaka Kurdistanê bisekinin.

Silav li riha pak ya şehîdan Xweragirî û serkevtin bo hêza pêşmerge û xelkê Kurdistanê Neman bo terorîstan û dijberên Kurd û Kurdistanê

PDKÎ
Deftera Siyasî
14.05.1393
05.08.2014



Mela Aware stêrka geş di esmanê tevgera 46-47 (67-68'an a Zayînî)

Arif Vêlî

Tevgera 46-47 (67-68'an a Zayînî) herçend ku şoreşek teji ji xwîn û qurbanîdan bû, lê weke qonaxaêke bi şewq û pirr ji cangorîtiya PDKÎ tê hesibandin. Di vê şoreşê de rast e ku desteyeke 38 kesî ji tekoşerên weke Mela Aware, Mo'înî, Seyîd Fetah Nizamî, Simayîl Şerîfzade, Mîneşem, û BapîrŞikak (Niho), tevî çend hevalên xwe li So-maya Urmiyê canê xwe kirin goriyê rizgariya gel û nîştiman, lê di rastî de ew şoreş bû sedema peyman nûkirina xelkê Kurdistanê Rojhelat di gel tevgera xwe û vejiyandin û rêkxistina pêşmerge, ku ji sala 1332 (1953) şûnde, di gel jevbilavî û kêmbûna çalakiyan bibû.

Mela Ehmed Hemewend naskirî bi Mela Aware, yek ji wan tekoşeran bû ku bi sedema bilindahiya hesta neteweyî, hest bi belengaziya neteweya xwe kir û her di temenke kêma de, piyê xwe danî nav cîhana pirr ji evraz û nişiv a Kurdayetiyê, û di salên 46-47 (67-68'an a Zayînî) de, roleke berçav list. Gellek nekêşa ku bi sedema hezkirina xelkê û hûrbîniya di karûbarên rêkxistinê de, mela Aware di asta herêmê de, bû

cihê baweriya xelkê û hevdem bû metirsî bo ser mozelanên rejîma Paşayetiye di herêmê de. Lewra Sawak ji bo şehîdkirina vî xortê fidakar dest bi pîlandarêtinê kir.

Sawak û dezgehên ajantiyê ên rejîma Pehlewî 5-6 salan hewil dan ku navbirî bixin davê, lê hewlên wan bê encam bûn.

Lê berpirsyarên rejîmê destê alîkariyê bo aliyê kirêgirtî û xwefiroşên xwecihî yên Kurd dirêj kirin, û piştî heyameke kurt û bi pîlaneke darêti mela Aware û çend hevalên wî bi dîl girtin.

Helbet şeweya girtina wî qehremanî hêsta rohn nine, lê li gorî axavtina xelkê vê herêmê Mela Aware di dema çareserkirina nakokiya çend cotyaran de, ji aliyê xwefiroşê herêmê ve di gel Rehmanê Wetman Çavşîn û mela Kece jehrwarî tene kirin, û radestî hêzên rejîma Şah tene kirin, hinek kes jî dibêjin ku Mela aware bi riya sîxorên navxweyî ve hatin girtin.

Ya balkêş ew e ku piştî çar mehan



îşkenceyê, Mela Aware navê yek kesî jî ku di rêkxistinê PDKÎ de kar dikirin eşkere nekir û bi vî awayî hem selmand ku nepeniyên gel û nîştiman bo heta-heta di nav dilê wî de dimînin, û hem jî wî şehîdbûna bi vî awayî, wate şehîdbûn bi parastina nihêniyan ve pê baştir bû.

Her eva bû ku di 11'ê Gelawêja sala

1347 (1968) ew bi du hevalên xwe re li bajarê Serdestê hatin gulebaran kirin, û tevî karwanê nemirên gel û nîştiman bûn, lewra di cihê xwe de ye ku di salvegera şehîdkirina wan tekoşeran de, li hemberî berxwedaniya wan de serê rêz û hurmetê bitewînin û di gel riha pak ya wan peymanê emegdariyê nû bikin.

212'emîn dewreya destpêkî ya pêşmerge bi dawî bû



Kurdistan media: Rêûresma dewreya 212'a pêşmerge di Fêrgeha Komîsyona Perwerde ya PDKÎ de bi rêve çû û dawî bi vê dewreyê hat.

Roja Duşemî 4'ê Tebaxa 2014'an, 212'emîn dewreya destpêkî ya pêşmergeyê Partiya Demokrat a Kurdistanê Îranê bi pişikdariya endamên rêberî û kadr û pêşmerge û malabtên PDKÎ di hola Fêrgeha Siyasî - Nîzamî a komîsyona Perwerde ya PDKÎ bi rêve çû.

Birgeya yekem a vê rêûresmê, bi xwandina marşa netewî ya "Ey Reqîb" dest pê kir û piştî bi nîşandana rêjeya nîzamî

berdewam kir.

Piştî Kêyhan Yûsîfî endamê cihgirê Komîteya Navendî a PDKÎ, çend gotinek pêşkeş kirin.

Piştî axaftinên Kêyhan Yûsîfî, hunermend Xolam Fatihê stranbêjê kora mûzîkê ya PDKÎ sirûdek bi navê Ez pêşmerge me pêşkeş bi amadebûyan kir.

Piştî peyama dewra perwerdehiyê ya dewrê ji aliyê Behmen Kerîmî ve hat pêşkeş kirin û paşan Cemal Fethî yek ji beşdarên devrê helbestek xwand.

Di navbera rêûresmê de çendîn stran û sirûdên şoreşgerî ji aliyê beşdarên dewrê ve hat pêşkeş kirin.

Xwazaya Kurdistanê ber bi jinavçûnê



Keyhan Yosifi

Di van rojan de, û li aliyê din yê bajarên Kurdistanê û li qontara zincîre çiyayên Zagros, dûman û reşayiya bi cihmayî ji şewitandina darberû û darên din firîna teyrûtevalan jî asteng kirne, da ku ne tenê li bilindahiyên esman, belkû li cihekê de kêmeke bêhneke rehet vedin.

Daristan mijûl in ku dişewtin û hawara metirsiyê bo nivşên pêşerojê ji xak ve tê bihîstin û deshilatdarên hikûmetî xemsar û bê xeyal ji her nîgeraniyekê çav û guhê xwe girê dane, û di piraniya haletan de, eva bixwe ne ku biryara agirberdana rasterast û ne rasterast li daristanên Kurdistanê derdikin. Çiyayên Kurdistanê cengelî ne, û zêdetir ji 4 milyon hiktari her ji derdora gola urmiyê ve bigre heya Loristanê daristan in. Lê ew daristan her sal û bi destpêkirina demsala germê, mijûl e ku dibin rejû.

Ew darên ku piştî çend salan bilind bûne, ji nişkêve tene jinavbirin. Xelkê Kurdistanê ji wargehên xwe hez dikin, lewra bi pêkanîna civatên jîngehparêz û girûpên agirvemirandinê, erkên organên hikûmetî bi tenê û bi dest betal girtine stûyê xwe. Eva di demekê de ye ku carna ji aliyê organên emniyetî ên rejîmê ve, û bi hêcetên bê bingehe tene girtin.

Nihêniya diramaya şewitandina daristanên Kurditanê bo hemû aliyekê eşkere ye û encamderên wê jî ew kes in ku li ser kursiyê deshilatê rûniştine.

Şeş hezar kîlometra çar goşe ji ava gola Urmiyê ji nav çûye, û nerazîbûna xelkê nekariye karbidestên rejîmê neçar bi bersivdanê bikin, herwisa wiha diyar e



ku ew bixwe bi zanebûn hewleke bi vî rengî dane, û hişikkirina vê golê û ew kirîza ku mijûl e pêşîra zêdetir ji 6 milyon xelkê hermê digre, wisa diyar e ku ji bo berpirsyarên hikûmetî gellek giring nebe, û bê buhatir be ji hizbulaha û Hemasê, ku budceya milyardî ya vî welatî bedla rizgarkirina gola Urmiyê diçe berîka wan de.

Di nav dilê Hewraman de rûbarê herî kurt ê cîhanê wate Kanî Bill, ber bi çikbûnê ve diçe. çikbûn li jêr zêdetir ji sed metr bilindiya ava bendava deryayê. Bendavek ku li gorî gotina karnasan, xisarên wê bo ekosîstema herêmê ji qazanca wê zêdetir e.

Yek ji malperên hikûmetî ên Îranê "kurdpress", di raporekê de nivîsandibû ku hekî bo firotina her bitlekê ava kanzaya Kanî Bill sed tûmen bê wergirtin, ew kanyaw di yek salî de nêzî 650 milyar tûmen dahata wê heye, dahatek ku zêdetir ji qazanc û dahata durustkirina bendava Daryan e, vê kanyawê şiyana dabînkirina ava vexwarinê ya zêdetir ji du milyon kesî heye.

Lê serbarê nerizayetia çalakên jîngehê û anîna belgeyan, birêveberê pirojeyê li ser jinavbirina

vê kanyawê pêdagir e, herçend li gorî gelaleya pêşniyarkirî ya şêvirmendan jî, dikarin bendavê çê bikin û Kanî Bilî jî nehê jinavbirin.

Ji aliyê çalakên kultur û jîngehparêz ve kempeyn û girûpên cur bi cur ji bo nerizayetî eşkerekirina li dijê jinavbirina xwazaya Kurdistanê hatine pêkanîn. Mixabin heya niha van hewl û tekoşînan nekarîye bandorê li ser rizgarkirina xwazaya Kurdistanê danên. Wate dengê van çalakan ew qas bihêz nine ku bikare karbidestan neçar bi hilgirtina pêngavên micid bike.

Pirsyarek ku dibe berbirûyê xelkê Kurdistanê bê kirin ev e ku çima di warê cîbicîkirina erkên xwe derheq nivşa pêşerojê berpirsyar nînin û ji rêkxirawên xelkî

piştevanîyê nakin.

Gelo ma heya niha bîr ji vê kirine ku nawendên yasadanîne ên welat û bajar, weke Mecilîsa Şêvra Îslamî û Şêvrên Gund û Bajaran, bi nav nûnerên wan mijûlî çî ne, û çima berpirsyar nînin di hemberî xwezaya Kurdistanê de? Gelo erka parastina xwezaya Kurdistanê tenê erka çend kesên çalak di warê jîngehê de, û çend kes ji xelkê gunadan e? Xwezaya Kurdistanaê sermayeyek giştî û neteweyî ye û tewahiya tex û qatan di parastina wan de berpirsyar in, lê ya ku heya niha jî hatiye dîtin, eva ye ku gellek kes di cîbicîkirina vê erkê de xemsar in, û metirsiyeke micid ku li ser nivşa niha û ên pêşerojê heye ew e ku xwazaya Kurdistanê li ser lêva kendalê jinavçûnê ye.



Nerîna Lîderan



Erdoğan:

“Demîrtaş birayên min ên Kurd dixapîne”.



Mustafa Cuma:

“Emê di demeke kurt de ji PYD'ê bihêztir bibin”.



Hosyar Zêbarî:

“Sedema pêşveçûna DAIŞ'ê Malikî ye”.



Demîrtaş:

“Bikaranîna destewajeyên yek netewe, yek ziman, yek ala û yek xak, faşîstiyane ye”.

Av û çavkaniyên avê yên Kurdistanana Îranê

H: Kurdistan

Av yek ji wan hokarên herî girîng e ku jiyanê dibexşe, jîngehê, û xwezayê ciwan dike, û derfet ji bo jiyanî mirov û jîndarên cûrbicûr pêk anîye. Her ji demên kevn ve gotine ku “Av û Avedanî”. Di welatên pîşeyî û pêşkevî de, ji avê beherê û golmekan, ji bo hênikkirina keresteyên pîşeyî mifahê werdigrin, û avê şîrîn diparêzin.

Berevajî di welatên weke Îranê de, ji avê şîrîn gellek caran bo keresteyên pîşeyî mifahê werdigrin, û gellek girîngiyê didin parastina avê şîrîn. Derheq girîngiya çavkaniyên avê yên Kurdistanê, û parastina jîngeha Kurdistanê û herwisa veguhastina ava Kurdistanê ji aliyê rejîma Komara Îslamiya Îranê ve bo cihên din ên Îranê, me gotûbêjek di gel birêz Çeko Rehîmî endamê Komîteya Nawendî a PDKÎ pêk anîye.

Pirs: Rêzdar kekê Çeko Rehîmî, kerema xwe di destpêkê de hinek bas ji av û çavkaniyên av û rûbaran li Kurdistanana Îranê ji bo xwînerên Kurdistanê bikin?

Bersiv: Kurdistan welatê Kurdan herêmeke stratejî ye ku di nav dilê erdnîgariya Rojhilata Navîn de cih digre, û ji herêmên girîng yên welatên Tîrkiye, Îran û Îraq û Sûriyê pêk hatiye. Herêmeke çiyayî ye ku di warê topogirafî ve, roleke bi bandor li ser rêjeya barîna befr û baranê, û hebûna çavkaniyên avê jê erd û avê li seredê de heye. Zincîre çiyayê Zagros û Agrî ku ji zincîre çiyayên Kurdistanê ne, ji sedemên diyar ên barîna befr û baranê li Kurdistanê tene hesibandin.

Barîna befrê li ser bilindahîyan, çavkaniya sereke ya ava rûbarên mezin ên Kurdistanê pêk tînin. Barîna baranê li cihên deşt û daristanan de, dibin sedema çavkaniyên ava jê erdê, ku dîmenek ciwan û kesek û pirr av bexşîye Kurdistanê. Kurdistan bi sedema zincîre çiyayê Zagros yek ji herêmên herî dewlemend ên pirr av ên Îranê ye, û ava rûbar û çemên rewan, golên Zîrêbara Merîwan û Urmiye, û bendav û avê jê erdê yên Kurdistanê dabîn dike. Çav-



Birêz Çeko Rehîmî endamê Komîteya Nawendî ya PDKÎ

Komara Îslamiya Îranê bi armanca veguhastina avê Kurdistanê bo nawenda Îranê û nawendên pîşeyî ji aliyekî, û ji aliyekî din ve li jêr avê xistina şûnwarên kevn ên dîroka Kurdistanê, û herwisa valakirina bajarok û gundên Kurdistanê, û ewlehîkirina rewşa herêmên Kurdistanê ew siyaseta meşandiye.

kaniyên sereke ên ava Kurdistanê ji barîna befrê Zivistanê li ser bilindahîyan dabîn dibe. Ku ew yek jî, çendîn zê û arûbarên pirr av ên hertimî û dehan rûbarên biçûk ên demsalî jê çê dibin, û di nav gund û bajarên Kurdistanê re derbaz dibin û dibin sedema kesatî, û hebûna bax û berhemên çandiniyê, û dabînbûna ava xelkê Kurdistanê. Mirov dikare riya avê rûbarên Kurdistanana Îranê bi vî awayî dabeş bike.

1-Çavkaniya avê bakûra Rojava (Bakûra gola Urmiyê) ku pêk tînin ji rûbarê Eres (Tîrkiye û sînorê welatê Azerbaycan û pildeşt) Rûabrê Kotelê (bilindhiyên geliyê kotel û Elendê), Axçay (Çaldiran), evane her hemî dirêjî nav behra Xezere de. Avaçiq çay (çiyayên

Avaçiq, bakûra Rojavaya Makûyê) û Sarî Sû ku ji Çaldiranê diçe bo Kurdistanana Tîrkiyê.

2-Çavkaniyên avê ku dirêjî gola Urmiyê pêk tînin ji: Zola Çay (Selmas), Çemê Nazlûyê (Tîrkiye û Bîradost), Şehar Çay (Cêrmê), rûbarê Gader, (Şino), rûbarê Candaran (Mehyabad), rûbarê Zerînerûd yan Cexetû (Çilçeme û hermê dol a Seqizê, Sêveçî ya bajrê Bane, û çiyayê Beranan), rûbarê Tetehû yan Sîmînerûd (Bîrayim hesarî Bokan), rûbarê Saroq (Mayin bilxa Hewşarê) rûbarê Ecîrlû.

3-Zêyê Biçûk yan Kelwê (ku ji Siya kêw, Maşkan û Lawên) çavkanî digre û piştî derbazbûna ji herêma Serdeştê ji sînorê Serdeşt û Qeladizê diçe Kurdistanana Başûr,

û ji wir ve jî dirêje nav Dîcleyê.

4-Çavkaniyên avê yên ku dirêne Kurdistana Başûr, û ji wir ve jî diçin bo Kendawê (hemû çavkaniyên avê yên parêzgeha Kurdistanê, Kirmaşan û Îlam) beşeke zad ji Kurdistana Îranê û paşmaweya wê ji parêzgehên Hemedan û Luristan ve çavkanî digrin, û piştî derbazbûna ji rûbereke berfireh ya Kurdistanê re, beşek dirêjne nav behra Xezer de, û para zêdetir dirêjne nav kurdistana Başûr û dawîya wê jî dirêje nav Kendawê de, ku pêk tên ji: Rûbarê Qışlaq (Hezar Kaniyan û Çilçeme), rûbarê Merîwan û çavkaniyên Zirêbar (Çilçeme û çiyayê Şaho), zêyê Sîrwan, (Qışlaq, çiyayê Şaho, ava Merîwan) rûbarên Zimkan û Zirişk (Gehware û taze ava), zêyê Seymere (Rewanser, Ciwanro, Mahîdeşt, Kozeran, Kengawer, Sehne, Nehawenda Mehabadê). Rûbarê Elwend) Kirind, Serpêla Zehaw, Qesrê Şîrîn, Geylan Xerb), Rûbarê Çenole (Melekşahî, Çenole, Salih ava, Îlam), Rûbarê Zerine (Eywan, Zerine, Serteng, Loristan ku dirêjne Kurdistana Başûr de. Rûbarê Tilwar (bilindahiyên Sine, Rûbarê Qizil Ozen, Mayin Bilax û Dîwandere çavkanî digrin, û dirêjne behra Xezer de.



Pirs: Hişikbûna gola Urmîyê û kêmbûna ava Zirêbar, çi pêwendîyeke di gel sazîkirina bendavan li Kurdistanê de heye?

Bersiv: Kurdistana Îranê bi sedema pirr aviyê ve, her di demên kevn de, hewcehî bi bendawê tunebûye, û tu şûnwarek ji bendavan nahê dîtin, lê berevajî li herêmên din ên Îranê de, ku bi dirêjahiya dîroka çend sedsaalên borî tûşî kêmbûna aviyê bûn, lewra şûnwarên bendavên kevn tên dîtin.

Herwisa bi sedema hebûna hikûmetên berdewam ên Îranê ku bawerî bi deshîlata komkirî di nawendê de hebûne, û hemû herêmên biryader ên aborî, û bazerganî û pîşeyî li nawendê komkiriye, hebûna nîfûseke zaf di van herêman de, pêwîstiya wê bi aveke zaf heye, û her lewra jî ji sala 1328'an (1950) şûnda, bendav li ser rûbarên Kurdistanê çê kirine. Bi armanca enbarkirina elektrîkê mifah jê wergirtine.

Heya berî şoreşa gelên Îranê 1979'an, pazdeh bendav û sala 1385 (2008) nêzîk bi 150 bendav di Îranê de çê kirine, ku 25 bendav li Kurdistanê ne. Li gorî gelaleyeke

pêşniyarî ya wezareta Wîzeyê (Enîrjîyê, Têhnê), ku ji bo lêdana 588 bendavan daye dewletê, piştî pesendkirina wê gelaleyê di meclisa Îranê de, û bi pesendgihîştina wê ji aliyê Şêvra Nobedar û weliyê Feqîh ve, bi Spaha Pasdaran û "cehada sazîndigî" ya ser bi biryargeha Xatêm El-enbiya hate spartin, da ku van pirojeyan cîbicî bike. Li Kurdistana Îranê ji bilî van 25 bendavan, mijûl in ku 15 bendavên din saz dikin, û 68 bendavên din jî mijûlî karkirina li ser in. Bi vê wateyê ku di herêma Kurdistanê de 108 bendav hebin. Xwezayî ye ku di heû welatên din û bi taybet welatên pêşkevî û pîşeyî de bendav hatibin sazîkirin, lê armanc ji hev cuda ne.

Ew bi armanca parastina avên şîrîn û ciwankirin jîngehê, û dabînkirina avê bo çandîniyê û bo ajeldariyê û avên paqij bo xelkê herêmê bendav saz kirine, lê Komara Îslamiya Îranê bi armanca veguhastina avên Kurdistanê bo nawenda Îranê û nawendên pîşeyî ji aliyekî, û ji aliyekî din ve li jêr avê xistina şûnwarên kevn ên dîroka Kurdistanê, û herwisa valakirina bajarok û gundên Kurdistanê, û ewlehîkirina rewşa herêmên Kurdistanê ew siyaseta meşandiye.

Komara Îslamiya Îranê her bi vê hindê razî nine, û bi dehan şirket û binyat li jêr navên (endazyariya Tonel, û valahiyên jêr erdê), li bajarên nawendî yên Îranê ava kirine, û kar dikin li ser lêdana dehan cur dirustkiriyan jêr erd, weke binkeyên Wîze (enrjîyê), tonelên hatûçûyîna trombêlan û şemendeferan, tonelên veguhastina avê, tonelên nav bajarên, tonelaên bin çiyayan, bo veguhastina ava jêr zewî û bendavan, tonela enbarkirina mewadên Hîdrokerbon, tonelên leşkerî bo enbarkirina teqemenî û mewadên jehrawî, tonela kaniyaw û kanzayan, û veşartina kirsên etomî), ku di çend salên borî de mixabin hemû curek ji wan tonelan ava kirine û dest bi kar bûne.

Her weke hate baskirin, Kurdistan di ava rûbaran de dewlemend e, û heya niha kêmtir hest bi hebûna avê hatiye kirin, lê di çend salên dahatî de, bandora talankirina ava Kurdistanê, wê hest pê bê kirin, û wê demê jî êdî dereng e.

Pirs: Veguhastina ava Kurdistanê çi bandorekê li ser jîngeha Kurdistanê dibe, û erka li ser milê rêxirawên siyasî û jîngeh-

parêziyê di Kurdistan de çiyê?

Bersiv: Yek ji bandorên herî berçav ên veguhastina ava Kurdistanê, kêmbûna ava gola Urmîyê û hişikbûna wê, û herwisa kêmkirina ava gola Zirêbar a Merîwanê, û bendavên Mehabad, Bikaner, û Qışlaqa Sine ye, ku bo zêdetir kêmkirina wan dîwarên bendavan bilindtir kirine, da ku avê bi fişareke baştir ve bidizin.

Li gorî lêkolîneke Saziya Avê ya Cîhanî, heya 10 salên din, nîva welatê Îranê tûşî hişikbûneke tewaw dibe, her bi vê armancê ye ku her ji niha ve bernameya bendava herêmên pirr av ên Kurdistanê, bo borî, û tonel, û ji rê derxistina rûbaran ber bi nawenda Îranê ve dest pê kirine. Li beşek ji herêmên Kurdistanê, kanyaw û Rûbar hişik bûne, û kêmbûna avê li zozanan tê dîtin. Rejîmê wê yekê vedigerîne ser kêmiya barîna baranê, lewra erka rêxirawên medenî û jîngehparêz û hizb û rêxirawên Kurdî ên Îranê ye, ku xelkê ji vê pîlana Komara Îslamî, û zirarên kêmbûna aviyê bo nivşa nû, û dahatî ya Kurdistanê agehdar bikin, û wan siyaseta rejîmê bê bandor bikin.

Komara Îslamî ya Îranê û roja nûçegihan



Şehab Xalidî

Cuda ji roja cîhanî ya nûçegihan, ji aliyê rejîma Komara Îslamî ya Îranê ve jî, roja 17'ê Gelawêjê roja ku nûçegihanê "Îrna"yê, bi navê Mehmûd Sarimî li Mezar Şerîf a Efxanistanê de, ji aliyê Taliban ve hate kuştin, weke roja nûçegihan hatiye binavkirin.

Diyarîkirina rojekê weke roja nûçegihan ji aliyê rejîma Îranê ve, di demekê de ye ku nûçegihan di Îranê de nikarin bi awayekî serbixwe û bê alî kar ji bo dana zanyariyên durust bi civakê bikin, û berevajî neçar in ku di çarçoveya siyasetên rejîma Îranê de kar û çalakiyên xwe berdewam bikin. Wate di çarçoveya vê sistêmê de ew bi tu awayî nikarin çavdêriyê bi ser kar û erkên nawendên dewletî de bikin, û zanyariyên durust bigelînin hemwelatîyan, ku eva jî binpêkirina bi eşkere ya mafên yasayî û pîşeyî yê nûçegihan e.

Herwisa rejîma Îranê ne tenê nûçegihan dixe girtîgehê de,



belkû zext û givaşê dixe ser malbatên wan jî, bona vê ku wan neçar bike ku yan dest ji karê xwe hilgirin, yan jî li gorî xwestekên wan kar bikin, lewra Îran her sal ji aliyê raporthinêrên bê sînor ve weke meztirîn girtîgeha nûçegihan tê binavkirin, û navê Îranê jî di gel

navê welatên weke Somalî, Sûriye û Pakistan û Çînê tê.

Zext û givaş bo ser nûçegihan bi taybetî di dema serkmariya Ehmedînîjad de gihabû astekê ku heya rehm bi "Civata Sinfî ya Rojnamevanan" jî nekirin, û li jêr zexta dezgeha dadweriyê de, ew civat hate daxistin, û di cihê wê de "Civata Sinfî ya Nûçegihan û Rojnamevanan" hate avakirin, ku ew civat bi tewahî li jêr çavdêriya dewletê de bû, û nedikarî bi awayekî serbixwe kar û xebatê bike.

Herçend piştî bidawîhatina serkomariya Ehmedînîjad û hatina Rûhanî bo ser kursiyê serkomariyê, gellek ji dengderan bawerî bi sozên Rûhanî kirin, û hêvîdar bûn bi vê ku rêz ji xebata nûçegihan bê girtin, û azadiya bîr û ra derbirîne nehê astengkirin, û bi çavekî emniyetî ve ji kar û pîşeya nûçegihan nehê nihêrîn, lê Rûhanî bixwe di rapora 100 rojî ya xwe de ragehand ku wî di hinek biyavan de deshilateke tewaw tune, ku ew yek nîşan dide ku biryarderê sereke di Ko-

mara Îsamiya Îranê de tenê weliyê feqîh e.

Ku wisa bû erkên li ser milê nûçegihan di Îranê de gellek girantir e ji erkên li ser milê wan nûçegihanên ku di welatê xwe de azad in. Di Îranê de nûçegihan dibe amade bin ku ji bo azadiya di karê xwe de, nixrê giran weke girtin, darvekirin û bêserûşûnkirin û îşkenceyê jî qebûl bikin, ku bê guman di sed-sala 21'an de, reftarekî bi vî rengî tenê kêrî bejn û bala vê rejîmê tê.

Lewra hewce ye hemû tex û qatên welat jî li hemberî zexta li ser nûçegihanên welatê xwe de, bédeng nemînin, û bi her awayekî ku ji dest wan tê, piştevaniya wan bikin, jiber ku azadiya rastîn û berdewam, bi yekîtiya di navbera hemû tex û qatên civakê di hemû astekê de, dikare bigihîje encamê, û tenê wê demê ye ku nûçegihan wê bikarin bêhnek azad hilmijîn, bi azadî hizir bikin, û bi azadî û bi çavekî rexnegirane çavdêriyê bi ser kar û kiryar û erkên deshilatê de bikin, û bixwe bibin sedema jiyaneke baştir ji bo hemû hemwelatîyên welatê xwe.



H: Arif Vêlî

Ayşe Îsma'îlî nasyariya xwe tevî PDKÎ weha tîne ziman: “Dema heriffîna rejîma paşatîyê li Îranê ez nûciwan bûm, lê min bi tewahî hest bi zulm û zordariya ser netewa xwe dikir. Nasyariya min tevî PDKÎ vedigere bo vê yekê ku bavê min pir ji vê partiyê hez dikir.

Tê bîra min ku di serdemê şoreşa gelên Îranê de, hîlbijartinek di navbera PDKÎ û Komelê de hat lidarxistin, dema bavê min ji dengdanê vegeriya, min jê pirsî ka gelo te dengê xwe da kîjan partiyê? Wî di bersiva me de got PDKÎ. Herweha di mala me de hertim RDKÎ dihat godarîkirin. Evana bûne sedem ku ez PDKÎ bi başî nas bikim.”

Ayşe Îsma'îlî derheq tewlîbûna xwe bi refên pêşmerge PDKÎ weha dibêje: “Bohara sala 1982(1361)’an min biryar da ku ez tevî refên pêşmerge PDKÎ bim, min pirsyara baregehên partiyê kir û gotin li derdora bajarê Seqizê ne. Ez hatim derdora bajarê Seqizê, lê mixabin PDKÎ baregehên xwe li wî derê ne hiştibûn û ez bi neçarî cardin vegeriya mala xwe.

Dîsan min pirsyara baregehên partiyê kir, lê vê carê gotin min ku li Pîrmihemed a ser bi bajarê Bokanê ne. Havîna sala 1983(1362)’an ez çûm Pîrmihemed û geştîm baregehên partiyê. Min daxwaza pêşmergekî kir, lê bi sedema kêmbûna temenê min, ez dam Yekitiya Lawan û bi fermî bûm pêşmerge PDKÎ û, heya niha jî li ser rêbaza vê partiyê xebata xwe didomînim.”

Ayşe Îsma'îlî roja herî xweş a jiyana xwe weha tîne ziman: “Demsala Zivistana sala 1984(1362)’an min weke pêşmerge li nexweşxaneyê 25’ê Gelawêjê pêşmergekî dikir. Rojekê Dr. Mirad ku yek ji nojdarên nexweşxaneyê partiyê bû, bi min re ragehand ku bi sedema vê ku tu xwendewariya te tu neye, gerek tu herî xwendingeha şoreşê û bibî xwediyê xwendewariyê.

Ez bi gotinên navbirî pir kêfxweş bûm. Kêfxweşiya min du sedem hebûn, ya yekemîn jiber vê yekê bû ku êdî ez dibim xwedî xwendewanî û ya duhemîn jî ev e ku, di wî çaxî de ku di civaka Kurdistanê de digotin naçêbe ku keç û jin herin xwendingehê, PDKÎ xwediyê xwendingehên taybet bû û gengeşeya xwendin û xwendingehan di Kurdistanê

Ayşe Îsma'îlî naskirî bi Hawrê, keça Mihemed sala 1965(1344)’an li bajarê Bokanê hatiye dinê.



de dikir. Eva ji min re pir girîng bû û ez pir kêfxweş dikirim.”

Ayşe Îsma'îlî herweha roja herî nexweş a jiyana xwe weha tîne ziman: “Rojê 22’ê Pûşpera sala 1989(1368)’an ez li mala xwe li Bolê bûm. Her di despêka rojê de ragehandin ku gerek xwe berhev bikin û ber bi nexweşxaneyê partiyê li Deftera Siyasî herin, ew yek bal me pir ecêb bû ku çima em herin wîderî? Em çûn û li wî her kes xembar û perîşan bû, min ji pêşmergeyekê pirsyar kir ku gelo çî qewmiye ku hemû wusa perîşan

in? Wê di bersiva min de go çima te nebihîstîye? Min go ne çî qewmî ye? Go Dr. Qasimlo şehîd kirine! Ez pir aciz bûm, tewahiya xelkê heyirî mabûn û heya heyvekêl her wusa man. Rewş pir nexweş bû heya rojekê Dr.Şerefkendî ji rêya RDKÎ ve peyamek belav kir û tede ragehand ku, heya kongireya dahatî ezê berpirsatiya birêvebirina PDKÎ bigirim sitûyê xwe.

Eva bûye sedem ku kadrê pêşmerge cardin morala xwe bidest bixin û dest bavêjin emelyatên mezin û berfireh.”

Ayşe Îsma'îlî derheq jiyana xwe ya hevpar dibêje: “Sala 1987(1366)’an bû ku hevjinê min Omer Xulamêlî ku wî çaxî kadrê fenî ya hêza Beyanê bû, daxwaza zewicînê ji min kir. Min pêşniyara Omer qebûl kir û di demsala Payîza heman salî de me jiyana xwe ya hevpar ava kir û berhema jiyana me jî keçek û sê kur in.”

Ayşe Îsma'îlî piştî pitir ji 30 sal xebat û pêşmergekî bû sekinîn, çavniheriya xwe ji PDKÎ weha nîşan dide û tîne ziman: “Min bi xwe rêya xebat û pêşmergekî hîlbijart, lewra ez pêşmergekî û xizmeta xwe liser partiya xwe û gelê xwe nakim minet. Heya niha derheq xebat û pêşmergekî xwe, ez xwediyê wîdanek rihet im û wê bi wîdanek rihet ve jî xebata xwe bidomînim û min tu çavniheriyek ji PDKÎ nine, tenê vê yekê dibêjim ku weke hevçeperekê ji min binêrin.”

Ayşe Îsma'îlî bi vê peyama û hêviyê dawiyê bi hevpeyvîna xwe tîne: “Peyama min bo xelkê Kurdistanê ev e ku pêşmerge zarokên we ne û xizmeta herî mezin diken ji we re dîkin, lewra hewce ye ku hûn jî li piştê pêşmerge bin û ji wan kesên dîr kevin ku piştê xwe dane netewe û nîştîmana xwe. Herweha hêviya min ev e ku çava dema ez hatim pêşmergekî, berî ku xwe bi baregehên PDKÎ binasînim min ziyareta Pîrmihemed kir, hêviya min ev e ku di dema azadî û vegeriya welat de jî, di despêkê de cardin ziyareta Pîrmihemed bikim û piştê herim nava bajarê xwe bokanê.”



Ayşe Îsma'îlî (Hawrê) pêşmerge PDKÎ di nexweşxaneyê PDKÎ



Îdrîs Stwet

Bilavkirina parazîtê bo ser mahwareyan û bandorên wê



Di Îranê de, her ji destpêka hatne serkar a rejîma Komara Îslamî ya Îranê, vê rejîmê bo bédengkirina dijberên xwe û sepandina hizra wîlayeta feqîh di Îranê de, li jêr navê berberkanê tevî fesada exlaxî, li seranserê Îranê dest bi bilavkirina parazîtê bo ser televîzyon û radyoyan kirin, û her tim hewla fîltêrkirina Întêrnêta dane ku zaftîrîn parazît li ser kanalên televîzyonên siyasî ne. Hev-dem tevî pêşveçûna têknolojiyê jî, car tevî carê jî rejîma Îranê parazîtên bihêz bilav dike.

Yasaya qedexekirina mahwareyan di Îranê de, li sala 1373 (1994) bi awayekî fermî ji aliyê meclisa Îslamî ya wî welatî ve hate pesendkirin, û di Îranê de pêka yasayê, bikaranîna mahwarê qedexe ye.

Eva di demekê de ye ku niha mahware di welatên cîhanê de wek beşek sereke ji pêdviyên mirovan tê hesibandin, û yek ji amrazên girîng bo wergirtina nûçe û zanyariyên dirust tê hesibandin.

Lê heya niha diyar nîne ku kîjan nawendên hikûmetî weke Deng û Reng, Spaha Pasdaran, Wezateta Îtîlaat, Moxabirat, her hemû berpirsê bilavkirina parazîtê ne.

Her çend ku hin kes li ser vê baweriyê ne ku Sipaha Pasdaran û Stada Fermana Îmam, berpirsê bilavkirina parazîtê ne, lê heya niha tu nawendeke hikûmetî bi awayekî fermî berpirsayeriya vê kiryarê negirtiye stûyê xwe, û heya meclisa Îslamî ya Îranê jî xwe li hember vê parazîtê bi berpirsiyar nizanin.

Heya niha çend car berpirsa siyaseta derve ya YE'ê daxwaz ji Îranê kiriye ku xwe ji bilavkirina parazîtê biparêzin ku ev kiryara tevî yasayên navneteweyî hevdu nagire.

Bilavkirina parazîtê ji aliyê Komara Îslamiya Îranê ve ku bi bê hûrbîniya derheq bandorên nerênîên parazîtê bilav dibe, tenê parazîtê naxe ser ragehandinan, û pêka lêkolîneran tirs bo ser liberçûna zarokan di

zikê dayîka wan, û arîşe bo hêlên Telefonan, û sîstema bankî jî heye, û ji aliyekî din ve midehek beriya niha rêkxirawa keş û hewayê Îranê di raportekê de, meclisa Îranê haydar kir ku bi sedema hebûna parazîtê nekarîne pêşbîniya bahoza Tehranê bikin ku di meha Hezîranê de bajarê Tehranê hejand.

Sarbarê bilavkirina parazîta bihêz ku bi taybetî li bajarên kurdistanê bi awayekî berfirehtir tê bilavkirin, wisa xûya ye ku bandorek li ser gelê Kurd û Kurdistanê nebûye, jiber ku di kurdistanê de, ji bo pêşgirtin ji bilavkirina bernameyên Televîzyonên kurdî, car na car bi awayekî berfireh li deverên kurdakincî helmeta komkirina Mahwaran dest pê dikin, û di kurdistanê de, bi erkê ser milê xwe dizanin ku bi bê îzin, û bi zorî xwe bavêjin ser malên kurdan, û mahware û sêlên mahwarêyên wan kom dikin.

Heya ku pêşiya gehandina zanyariyên rast û dirust bo xelkê bigirin.

Heya niha çend car berpirsa siyaseta derve ya YE'ê daxwaz ji Îranê kiriye ku xwe ji bilavkirina parazîtê biparêzin ku ev kiryara tevî yasayên navneteweyî hevdu nagire.

Komkirina sêlên mahwarê bi taybetî di kurdistanê de bi awayekî berfireh heye niha di tazetîrîn hewla komkirina mahwareyan li bajarên kurdistanê de, dest pê kiriye, her çend ku her di destpêkê de Rûhanî got ku komkirina mahwareyan tu encamek nebûye.

Lê piştî komkirina mahwareyan gelê Kurd dest bi kirîna dezgehên nû dikin da ku ji wergirtina zanyariyan paş nemînin û bi vî awayî pîlanên rejîmê pûç dikin.

Şahciwana Kurdistanê: Ez hez dikim bi riya televîzyonê, Kurdistanê bi cîhanê bidim nasîn

Gotinên
Navdaran

Rojeva pêşveçûnên dawî li Herêma Kurdistanê, nemaze jî pîrsa serxwebûnê, hêj di medyaya spanyayîxêv de tê gengeşekirin. Cara yekemîn e jî ku ajansa nûçeyan a fermî ya Meksîkê (Notimex) nûçeyan ji Kurdistanê radigihîne.

Nûçeya herî dawî ya vê ajansê li jêr navê "Bedewbûna Şahciwana Kurdistanê sîlaheke ji bo piştgiriya serxwebûnê" di gellek malperên meksîkî de hate belavkirin. Nûçegihana ajansa meksîkî li paytexta herêmê tevî şahciwana 2013'ê ya Herêma Kurdistanê Fênîk Mihemed hevpeyvînek çêkiribû.

Ciwana 25 salî ya ku li Swîsreyê jiyaye, û wêjeya Ferensewî li Jinêvê xwendîye, bi çavekî erênî rewşa jinên Kurdistanê dinirxîne, û wih dibêje:

"Em serbest in, gellek fersend di destên me de hene ji bo em bigihîjin armancên xwe, lê ew jî vedigere ser vê malbata ku di nav de dijî. Malbatên Misilman yên kevnepêst hene, û yên azadîxwaz jî hene, li cem Xiristiyanan jî wisa ye. Ev welat niha xwedî şahciwanekê ye, tiştekî ku beriya demê nediket aqilan. Di van rojan de jî jinên ku bixwazin dikarin her tiştekî bikin, heya jî dikarin bibin serkomar. Ji jinên Kurdistanê re dibêjim têbikoşin, ji bo ku xewnên we bibin rastî."

Ji bo ku piştgiriya bide hêzên pêşmergeyan, şahciwana Kurdistanê seredana wan kiribû, derbarê vê seredanê de, Fênîk ji ajansa nûçeyan a fermî ya Meksîkê (Notimex) re got:

"Ez çûm seredana pêşmergeyan di eniya şer de, ji ber ku ev erka li ser milên hemû welatîyên Kurd e. Bi rastî dixwazim alîkariya pêşmergeyan bikim, ez ji malbateke şervanan tîm. Di şer de min bav, bira, ap û pismamên xwe winda kirin. Niha dixwazim bi awayekî aştîyane têkoşînê bidomînim, ji bo



ew tiştê ku bavê min ji bo vî welatî re kiribû."

Derheq pirojeyên pêşerojê û xewna siberojê, Fênîkê wiha bersiv da:

"Min gellek pêşniyar wergirtin ji bo ku ez di zîncîrefîlman de bileyîzim, lê herdem min ret kiribûn. Ez pirr dirust im di hemû karên xwe de, nizamim leyîstikvaniyê bikim, rastî jî bêmim ez vî tiştî naxwazim. Hez dikim bernameyeke min ya televîzyonê hebe. Tiştekî wisa çandî be, ku ez tê de ji welatên din re behsa Kurdistanê bikim, ji bo ku li cîhanê binasînim.

Şahciwana Kurd dibêje: "Xewna

Ji jinên Kurdistanê re dibêjim têbikoşin, ji bo ku xewnên we bibin rastî."

min ya herî mezin di pêşerojê de, serxwebûn e, û dizanim wê ew yek pêk were, lê ew yek tenê hewcehî bi demê heye."



A: Firat Cewerî

Didinyayê de tiştê herî bi qîmet, ruhekî bi hereket e.

Emerson

Sebir, navekî hêzê yêdin e.

E.B. Browning

Sebir, hunera hêvîkirinê ye.

Vauvenargues

Mûyekî pore jinekê, ji sed cot ga baştir dikişîne.

James Howell

Mirovên qenc tu carî namirin.

Callimachus

Ya ku ez kirime nemir, ramûsanên te ne.

Margaret Fuller

Dengê herî xweş pesin e.

Ksenophon

Tiştonek



A: Mahir Berwarî

- Çindik çindik, bazda quncik, bê dil û bê gurçik.
- Hûr e wekî kirzin, reş e weku bizin, hakim ji ber dil-erzin.
- Sir û batê, çift vidûnatê.
- Li min filitî, li te xebitî.
- Tiştê min tiştok e, yê bi kulav û dersok e, navê wî zirreçepok e. (* bo hine tiştên dî jî dibêjin)

Bersiv: Kêç

- Çûme şikeftê ya tijî gupal, êkê wesa nebû bideme pal.
- Çûme rêleka bi dar bi dar, qet darekê we nebû bikime distar.

Bersiv: Şaxên Bizina

- Qun li axê, ser li qunê, deh le duwa.

Besiv: Mihdûşîn

- Çûme duleka bi xire ber, min dapîra te girt, bapîrê min xwe havête ser.

Bersiv: Perîna Nêrî

Têdîtin: Amadekar dest-kariya devoka metelokan nekiriye

Xwendevanên hêja!

Hûn dikarin bersiva tiştonekan bi rêya E-maila Agiri2003@gmail.com ji me re bişînin.



Beşa 15. Dema axaftinê Malbata xwe bide nasîn



Ez, bavê min, diya min û xwişka min.



Beşa 16. Dema nivîsînê

Valahiyên jêrîn dagirin

Malbata te ji çend kesan pêk tê?

.....

Bavê te çi karî dike?

.....

Diya te çi karî dike?

.....

Çend xwişk û birayên te hene?

.....

Tu diçî xwendingehê?

.....

Tu di pola çendan de yî?

.....

AGIRÎ

Navnîşana derveyî welat: AFKB.P. 102- 75623 ParisCEDEX 13 -FRANCE

E - Mail: Agiri2003@gmail.com


Hejmar (235)

Zavatiya bi kincên pîroz ê pêşmerge

Rojnamenûsê Kurd, yê bi navê Dîlan Reşad Rewan-dizî di şahiya xwe de, kincên pêşmergeyan li xwe kir û bi vî rengî dilsoziya xwe bo pêşmerge û xaka Kurdistanê nîşan da.



Her hemî şaş bûn



Hemiyan wisa hizir dikir ku Enîşteyn dema ku mezin be, wê lal bibe, jiber ku heya temenê 9 saliyê jî nedikarî bi başî biaxive.

Hemû rojê ser û guhên wî birîndar dibin!!



Tu kompanyayeke taybet bi bîmeya civakî amade nine ku nave "Cakî Çan"

ekterê Çînî li cem xwe tomar bike, bi vê pêkê ku ekterên ew ber-evajiyê ekterên din tewahiya dîmenên bi tirs yê nav fîlmên xwe de diceribîne, û hemşêvriyê bi kesên taybet bi vî warî nake, lewra berdewam birîndar dibe.